

Hasil MoU UMP bersama NIU

Penuntut AS belajar bahasa Melayu

oleh ZAMZURINA AHMAD
utusanpahang@utusan.com.my

KUANTAN 7 Jun - Keunikan dan kesantunan dalam bahasa Melayu mendorong lapan penuntut dan kakitangan dari Northern Illinois University (NIU), Amerika Syarikat datang ke negara ini bagi memantapkan lagi penguasaan bahasa tersebut.

Mereka berusia dalam lingkungan 23 hingga 60 tahun memilih Universiti Malaysia Pahang (UMP) di sini bagi merealisasikan hasrat tersebut termasuk mendalami sejarah Malaysia.

Menariknya, latar belakang pendidikan mereka bukan calang-calang kerana sebahagiannya bertaraf profesor dan ahli akademik dalam pelbagai bidang akademik.

Menurut Naib Canselor UMP, Profesor Datuk Dr. Daing Nasir Ibrahim, kesemua penuntut itu akan menjalani pembelajaran selama enam minggu bermula minggu lalu yang dikendalikan di bawah Pusat Bahasa Moden dan Sains Kemanusiaan UMP.

"Program itu sebahagian daripada Memorandum Persefahaman (MoU) yang diadakan antara UMP dengan NIU baru-baru ini.

"Selain mengikuti kelas, mereka akan ditempatkan bersama keluarga angkat masing-masing di Kampung Cherok Paloh di sini bagi mendalami budaya masyarakat Melayu," katanya ketika berucap pada majlis ramah mesra di UMP Jalan Gambang, di sini baru-baru ini.

Beliau menambah, mereka akan diberi maklumat mengenai daerah itu, kesultanan Melayu, makanan



DAING Nasir Ibrahim menyampaikan cenderamata kepada James T. Collin selepas majlis beramah mesra bersama lapan penuntut NIU di Kuantan, baru-baru ini.

tradisional Pahang dan berpeluang menyediakan persiapan perkahwinan mengikut adat Melayu.

Dalam pada itu, seorang profesor dari NIU, James T. Collin berkata, melalui program itu, mereka per-

caya hasrat membangunkan pemahaman bahasa Melayu dan Asia Tenggara akan tercapai.

"Saya harap dapat menerokai dan mempelajari budaya serta bahasa Melayu dengan berkesan," jelasnya.

Bagi seorang lagi profesor dari universiti tersebut Coral Carlson, 58, yang mempunyai tiga ijazah sarjana dan satu ijazah kedoktoran (PhD) teruja apabila berpeluang ke negara ini bagi meneruskan kajiannya.

"Perkara pertama yang saya fikirkan apabila sampai di Kuantan adalah untuk bertemu dengan bekas pelombong yang terlibat dengan aktiviti perlombongan di Sungai Lembing," jelasnya.

UM (Helo Kuantan) Rabu 8/6/11 Ms28